



Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 23/04/2021

Här President,

Sou wéi den Artikel 83 vun eisem Chambersreglement et virgesäit, bieden ech lech, dës parlamentaresch Fro un de Minister fir Landwirtschaft weiderzeleeden.

De 7ten Juni 2018 gouf an der Chamber iwwert d'Lëscht vum als geféierlech agestueften Hondsrassen debattéiert. Deemools war iwwert eng Petitioun zu dësem Thema an der Chamber debattéiert ginn an den deemolege Landwirtschaftsminister Fernand Etgen sot :

"Wann een dës Virfall mat Hënn réckbléckend analyséiert, kann ee feststellen dass et sécher net déi Rasse vu geféierlechen Hënn aus dem Gesetz sinn, déi méi oft concernéiert sinn, ganz am Contraire. Dës Rasse sinn éischer wéineg an deenen dote Fäll verwickelt. Ganz oft sinn dës Attacken dorobber zréck ze féieren, dass de Besëtzer onverantwortlech gehandelt huet. [...] Geféierlechkeet vun engem Hond ass an deene meeschte Fäll keen objektive Parameter."

D'Hondsgesetz gouf awer no dëser Debatt net ofgeännert an esou ass d'Lëscht mat de "geféierlechen" Hondsrassen nach ëmmer a Kraaft.

An deem Zesammenhang wéilt ech dem Minister dës Froe stellen:

1. Wéi steet den héitegen Landwirtschaftsminister zu dem Artikel 10 vum ofgeännerten Gesetz vun 2008?
Wier d'Regierung bereed, d'Lëscht mat den als "geféierlech" agestueften Hondsrassen aus dem Gesetz ze huelen?
2. Wéi vill Persounen goufen an deenen leschten 5 Joer duerch Hënn verletzt?
Ass bekannt ëm wéi eng Rasse vum Hënn et sech bei dësen Attacken gehandelt huet?
Falls jo, wéi vill Prozent vum den Attaquen ginn op déi sougenannt Lëschtelhënn zréck?
3. Laut Artikel 12 vun dësem Gesetz müssen déi betraffe Besëtzer un enger Formatioun deel huelen, fir de richtegen Ëmgang mam Hond ze garantéieren. Am Fall wou den Artikel 10 géif gestrich ginn, wéi gedenkt d'Regierung mat dësen Formatiounen, déi jo ee Schutz vu Mënsch an Déier solle garantéieren, weider ze fueren?



www.piraten.lu

4. Dem selwechten Artikel no dierfe Persounen ënnert 18 Joer, a Persounen, déi wéinst Verbrechen oder verschidden Delikter verurteilt goufen, net Besëtzer vun engem Lëschtendond sinn. Sinn der Regierung Verstéiss géint de Paragraph 1 oder de Paragraph 2 vum Artikel 12 bekannt?

Mat déiwem Respekt,



GOERGEN Marc
Député

